



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 10 Yangia anidakangma :

f Tir Yimyim

Instagram tiryimyim@aolima

YouTube tir yimyim

TAPAK 8

Brian Lara-i SRH head coach inyaktsü

Taoba Sri Lanka tir Rajapaksa aputsü akhanger



VOL. XIX NO. 319 (ADOK 319) DIMAPUR AMUNGNÜ (SUNDAY) RONGJUI (SEPTEMBER) 04, 2022 ₹ 5.00

COVID-19 Nagaland: 2 dak putet, 2 asü

Kohima, September 3, 2022 (TYO): Nagaland nung Honibarnü nisung 2 dak COVID-19 putet, 2 taneptsü angu aser COVID-19 puteta alir nisung 2 asü.

Tanü Kohima aser Longleng nung nisung kaka dak COVID-19 putet aser tena züingsema ajak agi 35,926 kümogo.

Külen Dimapur nung nisung ana taneptsü angu aser tena züingsema taneptsü angur ajak agi 33,616 kümogo.

Nagaland nung tang nisung 19 anepaludar aser parnok rongnung nisung 4 dak shirangba yimya terara lir saka 15 dakbo shirangba yimya kecha mali.

Honibarnü Dimapur nung COVID-19 puteta alir nisung ana asü aser tena züingsema tasür ajak agi 779 kümogo.

September 2, 2022 tashi nung Nagaland nung Covid vaccine indang dose 17,21,438 agütsüogo.

India nung nisung 7,219 dak COVID putet, 25 asü

New Delhi, September 3, 2022 (Agencies): India nung Honibarnü nisung 7,219 dak Covid-19 putet aser parnok züingsema nisung ajak agi 4,44,49,726 kümogo, ta Union Health Ministry-i metetdaksü.

Tesüiba ghonda 24 tsüingda COVID puteta alir nisung 33 asü aser parnok züingsema tasür ajak agi 5,27,965 kümogo.

Maneni, tesüiba ghonda 24 tsüingda nisung 2,465 COVID-

19 nungi taneptsü angu. Parnok züingsema taneptsü angur ajak agi 4,38,65,016 kümogo.

Tang tashi nung Covid vaccine indang dose crore 213.01 agütsüogo ta Union Health Ministry-isa metetdaksü.

Tesüiba ghonda 24 tsüingda asürtemji Maharashtra nung nisung 6, Kerala nung 3 aser Delhi, Uttar Pradesh o West Bengal nung anana liasü.

NIA-i Assam nung tesem 16 mita ao

Guwahati, September 3, 2022 (Agencies): National Investigation Agency (NIA)-i Hokolbarnü Assam nung United Liberation Front of Asom-Independent (ULFA-I) dak sendakba nung tesem aika mita ogo.

NIA-i Kamrup, Nalbari, Dibrugarh, Tinsukia, Sadiya, Charaideo aser Sibasagar nung mita aodang ULFA den sendakba kuliotem, kaket aser digital devices ngutet.

NIA-i Assam kübok district 7 nung tesem 16 shi mita ao aser ULFA den sendakba taitüsü aketba kulikakettem, digital devices aser injangtem ngutet.

ULFA-i lanurtem anioker, tashiyim agi sen meshir, lanurtem anisar aser Myanmar nung training agütsür ta NIA-isa. May 18, 2022 nü NIA-i ULFA-I anema ken o ka benoka liasü aser maneni bushisingdang südar.

Nitish-i Manipur nung JD(U) MLA

Patna, September 3, 2022 (Agencies): Manipur nung JD(U) MLA temi BJP nung adenba atema Bihar Chief Minister Nitish Kumar-i jashiba osang metetdaksüogo.

Patna nung tang JD(U) national conclave ka agir aser tanü Nitish Kumar-i osangbener den jembidang BJP-i MLA tem alizükba ya ozüingi melar asü masü ta asüingdang.

Manipur nung JD(U) MLA temi iba senden nung adentsü shia liasü aser JD(U)-i NDA den madentsü lemtet pusema liasü, ta paisa ashi.

"Onok NDA nung adendang BJP-i ozü MLA tem nem kecha magütsü. Tangbo parnok mesüzükogo" ta Nitish-isa shisem.

"Iba inyakim ya tim asü? Ozüingi melar asü? Iba ya lateta aliba inyakim den liromedema lir asü? Parnoki iba mapa ya ajaklen inyaker. Anungji 2024 nungbo party ajak longjemtsüla" ta JD(U) tanishir Nitish-isa metetdaksü.

Tongtipang lennirtem den ajuruteptsü aser opposition longjemtsü indang jembitsü atema tarutsü anogotem pa Delhi-i aotsü asü ta osangbeneri metetnua asüingdang Nitish Kumar-i aotsü ta langzü.

Hokolbarnü Manipur nung JD(U) MLA 5-i BJP nung aden. Taküm March ita Manipur assembly elections nung JD(U)-i constituency 38 nung toktep aser parnok 6-i takok ngua liasü.

India nungi Congress samar, alima nung Communists samar: Amit Shah



Amit Shah

Thiruvananthapuram, September 3, 2022 (Agencies): Kerala nung BJP SC conference nung Union Home Minister Amit Shah-i state aser Congress party tarutsü indang jembia.

India nung anüolentip tsütsü aliba state tem atema tarutsü Bharatiya Janata Party (BJP) lir aser alima nung communist party tem agiener, ta Amit Shah-i ashi.

"India nungi Congress samar aser alima nung communist party samar. Kerala asoshi tarutsü BJP dang lir" ta Honibarnü Thiruvananthapuram nung Amit Shah-i ashi.

"BJP-i aniba Centre sorkari backward aser minority classes ajungkettsü lemtetba atema tenüingsang agütsür. Congress party aser Communist temi kodanga Scheduled Tribes

ajungkettsü atema meinyak saka vote banks ama dang benshi" ta paisa metetdaksü.

Dr BR Ambedkar-i shilem agiba Congress-i mereprang kechiyong par sorkar kübok pa nem Bharat Ratna magütsü. Congress sorkar atsüingdokba sülen ang pa nem Bharat Ratna agütsü, ta Amit Shah-isa ashi.

Union Home Minister Amit Shah-isa tanü Thiruvananthapuram nung 30 buba Southern Zonal Council meet nung o jembia liasü.

Iba sentong nung southern states aser Union territories nungi Chief Minister aser Lieutenant Governor tem aden.

Senden nung Amit Shah-i ayong tzi lemsateptsü atema külemi lenmang kar bushiteptsü ayongzük.

Paisa Andhra Pradesh aser Telangana dang ken o tem angatetteptsü ashi.

Meghalaya nung BJP-i NPP den pilatsü akok

Shillong, September 3, 2022 (Agencies): BJP-i National People's Party (NPP)-i aniba Meghalaya Democratic Alliance (MDA) sorkar meyaritsü akok.

Iba osang ya Meghalaya in-charge aser Bharatiya Janata Party (BJP) lennir Chuba Ao-i Honibarnü ashi.

"Olemtepdar aser onoki ita ka tsüingda NPP den teloktep anentsü akok. Onoki iba ya ozü National President JP Nadda den jembitsü" ta Chuba Ao-isa ashi.

"Party-i teyari anenba sülen onoki tarutsü atema sentongtem atongtsü aser nübortem dang onok tebilemba metetdaksütsü" ta paisa shisem.

"Meghalaya state sorkari tim masüba maparen inyakba kulikakettem BJP-i bendener aser iba sülen Enforcement Directorate aser Central Bureau of Investigation (CBI) ajanga mapa inyaktsü. Central leadership dena party jenjang ajak nung jembidar aser ita ka tsüingda telemtetba agütsü" ta Chuba-isa metetdaksü.

"Onoki ozü nisungtem dang kulitem bendentsü tetuyuba

agütsüogo. Iba sülenji asenoki NPP ya ochimashi asü masü'ar metettsü" ta paisa ashi.

BJP-i ochimashi khenyongi magizüker aser iba kulikakettem ajanga tai tongloksüba ken o tem putettsü, ta paisa shisem.

2023 assembly election nung party kar den danga tesentaktep ayutsü asü koda ta osangbeneri asüingdang "BJP-i tanga party dang memepishitsü mesüra masüingdangtsü saka taruba sorkarji BJP teyari medeni akümtsü makok" ta Chuba Ao-i langzü.

NPP-i 2023 election nung kija dang tokteptsü ta Meghalaya Chief Minister Conrad K Sangma-i ashiba atema Chuba-isa "onoki NPP nem tetuyuba mesüra temepishiba agütsütsü makok saka BJP medeni taruba sorkar mekümtettsü" ta metetdaksü.

Election nung tesentaktep ayuba ya teti atema masü aser election agiba sülen pei pei wadang inyakyonga aotsü, ta paisa ashi.

Tan hopta tetenzüklen Delhi nung osangbener den jembidang NPP national president Conrad K

Sangma-i sangküm assembly election atema party renemer aser parnoki BJP mesüra tanga political party kecha dena tesentaktep mayutsü ta shia liasü.

Meghalaya sorkar nung NPP MLA 23 lir aser United Democratic Party MLA 8, People's Democratic Front (4), Hill State People's Democratic Party (2), BJP (2), Nationalist Congress Party (1) aser Khun Hynniewtrep National Awakening Movement MLA 1 temi parnok pusema nungiter.

Maneni Congress nungi anentsü MLA 5-ia NPP-i aniba sorkar pusema nungiter.

Külen, opposition Trinamool Congress (TMC) MLA 12 lir.

Saubhagya tim mesüi inyakba, ozüing alema nakmati atuba, FCI rice tim mesüi amshiba, Jaintia Hills Autonomous District Council (JHADC) aser Garo Hills Autonomous District Council (GHADC) nem Special Assistance Grant Scheme nungi central fund agütsüba tim mesüi amshiba ken o tem atema BJP-i Conrad Sangma'er sorkar anema jembia arur.

ANTA-i taxi driver tem amakba azüoktsü mepishir

Dimapur, September 3, 2022 (Agencies): Nagaland nung Taxi Driver tem kanga amakba atema All Nagaland Taxi Association (ANTA) Hq. Kohima-i khuret abenba osang metetdaksüogo.

ANTA, Kohima-i state sorkar, ketdangsurtem, bangdak department aser public nem iba osang metetdaksü.

Ita ishika Nagaland nung mejangjaba nisung kari Taxi Driver tem amaker, teka sangshir aser

auyar, ta parnoki ashi.

August 1 nü mejangjatetba nisung anati Shortcut 10th Mile nung taxi ka tashiyim agi anendaksü aser passengers dang nungi sen meshi aser parnok indang phone rakzük, ta ANTA Hq. Kohima-i ashi.

Maneni, August 3 nü mejangjatetba nisung aseme prangpong bener Medziphema nungi Pherima Village tashi Taxi ka hire asü aser Tsiepama Model

Village entrance gate anasa parnoki driver züka merenshi aser sen auya, ta parnokisa metetdaksü.

All Nagaland Taxi Association (ANTA) Hq. Kohima-i item inyakim khukhua aitsür aser aibelenertem merenshitsü ta metetdaksü.

Parnokisa state sorkar dang mapa inyaktsü aser aibelenertem Section aser Acts tapet kübok merenshitsü atema temepishiba agütsüogo.

Na mali küm ka
T. Meren Tzüdir
04.09.2021



Na onok den meliaka nü mapa tajungtem agi onok
mulung süngzüker.
Onok aodak aser inyakkak ajak nung nü mapatem bilemteter.
Na onok dangi arutsü imlar, saka tamakoktsü.
Tanaben majurutep tashi.

~ Temeim Kinungtsü & Chirnunrtem

Kohima Law College aser IDIA na tenangzüktepba ka yanglu



September 1 nü Kohima Law College aser IDIA Charitable Trust na tsungda tenangzüktepba yangluba noksa nung angur.

Dimapur, Rongjui/September 3 (TYO): September 1 nü Kohima Law College aser Increasing Diversity by Increasing Access (IDIA) Charitable Trust na tenangzüktepba ka yangluogo.

IDIA indang office headquarter ya Bengaluru, Karnataka nung amenoka lir aser parnoki tangar ama maongka peria mangoba kaketshirtem nungtugu obendanger aser community advocates tem kümdaktsütsü atema inyaker.

Kohima Law College-i, student volunteer body ka amenoktsü atema IDIA nem teyari agütsütsü mulunga agizükogo, koba IDIA indang official "Nagaland Chapter" ama inyaksangshitsü. IDIA project ya India kübok tesem balala nung law school tem nungi kaketshir volunteer tem dak metaloker inyaksangshir,

shirnoki law azüngtsü atema sempet aliba tekübokba jenjang nung aliba kaketshirtem bushia senzür.

IDIA kübok State Chapters 25 shi lir. Chapter ajak nung state kübok law school balala nungi kaketshirtem team lenir kati anir kaketshir volunteers 20 nungi 30 tsungda alir. Parnoki pei state nung school balala nung sentong balala ayongzüka agir aser law azüngtsü atema sempet aliba tekübokba jenjang nung aliba kaketshirtem shimmer aser CLAT aser tanga tatidang atema renemtsür aser parnok law college temi aiba sülen len sayur. Iba sülen IDIA-i teshimtetba kaketshirtem nem India nung law entrance tatidangtem atema tesayuba balala agütsür. Law school tem nung züngoksemba sülen IDIA-i item kaketshirtem atema sponsorships/scholarships aser mentorship schemes balala achaayangja teyari agütsür.

India nung law school/university tajungtem aikati IDIA kaketshirtem dang tah magi züngdakja arudar.

Asst. Professor Kezhokhoto Savi-i IDIA indang yimiyim; Why Legal Education? Indang teteshia jembi. Law ya kanga tashi tait hadir ka koba tekübokba jenjang nung aliba lokti temia sector balala nung mapai aitsü atema kaketshir shisatsü angazüktsü asoshi benoka inyaksangshitettsü. Sector tem rongnung courts (litigation), law firm tem, company balala, international organization tem, human rights & social activism, policy think-ranks, research & academia, aser legal journalism amala densema lir. Iba ajanga ano maongka peria manguba lokti nungi kaketshir kati advocacy tasatem arangshitettsü aser iba ajanga parnok ya tetangshi lenir kaka aser lokti atema otongdarterem kümtettsü, ta pai ashi.

NSCN/GPRN-i benjung salem lemsatep

Dimapur, Rongjui/September 3 (TYO): NSCN/GPRN-i sangdong ka ajanga Sangtam nungertem den Mongmong benjung salem lemsatepogo.

Mongmong ya Sangtam nunger atema benjungtem rongnungi tongtibangtiba lir. Iba benjung amungba nukjidong tongtibangtibaji ki tsüngrem aser meshi

tsüngrem külemtsü asoshi lir. NSCN-i Sangtam nungertem atema Tsüngrem temaotsü meshizüktsür aser iba benjung amungba ajanga Sangtam nungertem nem temaotsü aser yimji yimjung bener arujang ta sarasademtsür, ta NSCN/GPRN (Akato Chophi), MIP sangdong ka ajanga lemsatep.

Nagaland nung Army Recruitment Rally ayonger

Dimapur, Rongjui/September 3 (TYO): Nagaland nung district ajak atema Agniveer Army Recruitment Rally, September 7 nü nungi 15 nü tashi Bhagat Stadium, Rangapahar Military Station, Dimapur nung agütsü.

Candidates shirnoki rally atema online ajanga pei tenting züngoksemogo, parnok indang Admit Card tem generate sütsür

email ajanga yokogo. Shirnoksia rally atema tenung züngoksemogo, parnoki rally agütsüba tesemi admit card copy anana bener arutsü metetdaktsüogo. Anogo aser mapang admit card nung shisema lir, ta PRO (Defence), Kohima, Lt Col Amit Shukla-i sangdong ka ajanga metetdaktsü.

Dimapur nung demand-driven skill development sentong agi

Dimapur, Rongjui/September 3 (TYO): Dimapur district atema construction sector kübok demand-driven skill development sentong tatembangbuba September 3 nü Town Hall nung agiogo.

Sentong nung Zynorique Initiative Society nungi Master Trainer, Kumar-i, trainers tem dang parnoki bendanga agüja nongita yariba atema kanga pelaba lemsatepba den parnok dang hadirtem mashiymi mamshitsü aser pei tesemi aoba sülena maneni meranga inyaktü ajungshia liasü.

Ajak senteper Dimapur district nungi trainer 62 aser Nagaland kübok tanga district nungi trainers temi iba sentong nung shilem agia liasü.

Sentong nung tajungshi o jembiba mapang SDO (Civil), Dimapur, L. Samuel Konyak-i, iba training ajanga trainer tem tarutsü nung teyari agütsütsü imlaba lemsatep. Paisa, parnok dang nendaka inyaktü ajungshiba den parnoki dang ochishia aser bendanga agüja inyakra takokji pasasa arutsü ta ashi.

Training shibangba sentong ya Er. Imchen Ao, Principal, Women Industrial Training Institute (WITI) Dimapur lenisüba nung agi aser Gideon L. Sumi, District Employment Officer, Dimapur-i tepela o jembia liasü. Maneni sentong nung Kahoto K. Zhimomi, TA, DEE, Dimapur-i Tsüngrem temoatsü meshizüka sarasadem.

SCPD Court-i tetuyuba agütsü

Dimapur, Rongjui/September 3 (TYO): State Commissioner for Persons with Disabilities (SCPD)-i, Regional Director, National Institute of Open School, mata mabensar kaketshirtem tatidang mapang nungdak makaba nung timtem ajangshitsü aliba nungi jenboa toktsütsü atema staff tem aser talisa Centre Superintendents aser Invigilator tem atema training aser sensitization sentong ayongzüka katsütsü tetuyuba agütsüogo.

SCPD court nung Deaf Biblical Ministry, School for the Deaf, Dimapur indang Principal-i ken o ka benokogo aser ashiba agi, tenarong agi mangashiba lar kaketshir ka 23.04.2022 nü tatidang agütsüba centre nung mesenmetui amshia liasü. Mesenmetui amshirtem indang osang tejangja nungdakba ajanga iba ken o ya tashishiri aginatokogo, saka iba ken o ya bentettsüla ta okadaki bilemer.

Tetuyuba nung ashiba agi, ken o benokeri taoba mapanga iba amala timtem ajangshiba lemsatepogo. Lokti nung tangar memenepi aliba Kaketshirtem kuli kaketshir shidak/ Regional Director, National Institute of Open School, Guwahati, Assam-i, parnok nem mapang

talila agütsütsü aser tatidang mapang teyari talila agütsütsü atema tetuyuba agütsüba shiti bena liaka Centre Superintendents aser Invigilator temi tetuyuba ama minyak.

Iba amala tatalokba ajanga Centre Superintendent aser Invigilator tem matongba sayur, ta tetuyuba nung ashiba den iba tetuyuba copy ka Regional Director, National Institute of Open School, Guwahati, Assam nem agütsütsü, ta ashi.

"Field nung aliba ketdangsur aser talisa Centre Superintendent aser Invigilator tem nem mata mabensa aliba kaketshirtem den inyaksangshiba mapang aser tatidang mapang parnok atema provision tem agüja aliba angazükdaktsütsü atema training aser sensitization sentong ayongzüka agütsü asoshi takokba tashi jenjang ajak agütsü atema Court-i Regional Director dangi abener. Iba amala sentong ayongzüka agütsü atema onük nung mongintem den tongtepratepsüla aser khen dang masü saka mapang shia ayongzüka agütsüla, ajita asünungdang tarutsü nung iba amala ken o matoktsü," ta State Commissioner for Persons with Disabilities, Diethono Nakhro-i tetuyuba nung shia lir.

Manipur nung JDU MLA 5 BJP den loktepogo



Manipur Chief Minister Biren Singh den State BJP President A Sharda Devi nati BJP nung adenba JDU MLA 5 pelashishia agizükba noksa nung angur.

Guwahati, September 3, 2022 (Agencies): Manipur nung Nitish Kumar-i aniba Janata Dal-United (JDU) MLA 6 nungi 5-i BJP nung denogo.

JDU MLA 5-i BJP den loktepba Speaker-i pelashishia agizükogo, ta Manipur Assembly Secretary K Meghajt Singh-i ashi.

BJP nung adenba MLA temji asemi nungi anasü agi teimba lir anungji agizüker ta paisa ashi.

2020 küm Arunachal Pradesh nunga JD(U) MLA 7 nungi 6-i BJP nung dena liasü. Taoba hopta tu JD(U) MLA ka anünga aliba jagia BJP nung denogo.

Manipur nung BJP nung adenba MLA temji- Kh

Joykishan, N Sanate, Md Achab Uddin, taoba DGP L M Khaute aser Thangjam Arunkumar nung lir.

"State BJP President, A Sharda Devi den külemi BJP nung adenba JDU MLA 5 pelashishia agizükogo. Iba loktepba ajanga nübertemi PM Narendra Modi aser BJP President JP Nadda lenisüba meimba aser temulung alemba sayur" ta Manipur CM Biren Singh-i metetdaksü.

Ajisüaka, iba inyakyim ya political party aikati aitsür.

JD(U) züngsem 5-i loktepba ya Constitution indang 10th schedule alema lir anungji High Court dangi abentsü ta opposition party Congress-i

metetdaksüogo. "Manipur nung JD(U) MLA 6 nungi 5-i BJP nung loktepba ya ozüngi memelar aser Constitution kübok disqualification asütsü akok. Onoki High Court nung parnok disqualify asütsü atema ken o benoktsü. Save Constitution, Save Democracy" ta State Congress spokesperson Ningombam Bupenda Meitei-i metetdaksü.

Taküm August ita Bihar Chief Minister aser Janata Dal-United (JDU) tanishir Nitish Kumar-i BJP den tesentaktep pila aser Tejashwi Yadav'er Rashtriya Janata Dal, Congress aser tanga political party tem den külemi sorkar kümogo.

Tamil Nadu sorkari Assam telok nem Joymala den majurtepdaksü

Guwahati, September 3, 2022 (Agencies): Tamil Nadu nung tekülem ki ka nung Assam nungi bener aoba shidi Joymala r e s h i k a n g s h i b a bushisüngdangtsü atema Assam Chief Minister Himanta Biswa Sarma-i telok ka yok.

Züngsem pezü agi akümba telok nung Forest, Veterinary aser Police ketdangsurtem dena lir.

Parnoki tekülem ki tonga ao saka Tamul Nadu sorkari Joymala den majurtepdaksü. Tamil Nadu CM M. K. Stalin state nung maliba agi Assam telok nem Joymala den ajuruteptsü memela ta osang angazüker.

Tamil Nadu nung aliba tekülem kidang mahout temi Joymala reshikangshiba indang osang tawa tu prokshia liasü

asir iba jagi la Assam-i anir arutsü lemtet.

People for the Ethical Treatment of Animals (PETA)-i Joymala reshikangshiba indang video ka sayua liasü.

Iba video ajanga linük nung nisungtemi ola adokba sülen Assam nungi southern state temi bener aoba shidi 8 indang osang agiteptsü tenzükogo.

Assam nung CWG Gold Medalist Nayanmoni DSP mendeni ajungket

Guwahati, September 3, 2022 (Agencies):

Commonwealth Games, 2022 nung Indian Women team-i Lawn Bowl nung gold medal angu aser iba nungi Assam nungi Nayanmoni Saikia dena liasü. Iba atema Honibarnü Nayanmoni Deputy Superintendent of Police (DSP) menden nung ajungketogo.

Guwahati nung aliba Janata Bhawan nung Assam CM Himanta Biswa Sarma-i Nayanmoni Saikia nem tetushi agütsü.

Commonwealth Games 2022 nung Nayanmoni aser lar teloki Lawn Bowl nung South Africa madak 17-10 agi takok ngua gold medal angu.

Iba telok nung Lovely Choubey (lead), Pinki (second), Nayanmoni Saikia (third) aser Rupa Rani Turkey (skip) nungertem liasü.

Nayanmoni ya Golaghat district kübok Tengabari nungi lir. Dhansiri District Sports Association aser tanga telok aikati Nayanmoni nem tenüngsang agütsüogo.

Nagaon nung ganja seret 400 apu



Guwahati, September 3, 2022 (Agencies):

Assam Police-i Central Reserve Police Force (CRPF) den yaritepa ganja seret 400 jungnüa puogo.

Parnoki Nagaon District nung ganja apu aser iba dak sendakba nung nisung ka pua lir.

Osang tejangja ka angazükba sülen Assam police aser CRPF külem telok kati Nagaon jila nung mita aodang

Hasan Ali'er kidang ganja yua aliba angu. Iba dak sendakba nung police-i pa apu.

"Ali-i ganjaji Nagaland kübok Dimapur District nungi bener aru aser Nagaon nung lemshi" ta Nagaon district Superintendent of Police (SP) Leena Doley-i ashi.

"Onoki drugs aser NDPS anema maneni mapa inyaktsü" ta Nagaon SP-isa ashi.

ASTC-i Olectra nungi electric bus 100 alizüktsü

Guwahati, September 3, 2022 (Agencies):

Assam State Transport Corporation (ASTC)-i Olectra Greentech Limited nungi electric bus tasen 100 alizüktsü.

ASTC-i Hyderabad nung amenoka aliba electric bus manufacturing company Olectra Greentech Limited dang bus 100 alitsü atema Letter of Award agütsüogo.

Olectra Greentech Limited-i ita 9 tsüngda bus 100 agütsütsü aser küm 5 atema bus anepalutsü.

Olectra-i electric bus 100 ayokba nung Rs 151 crore shi angutsü.

"North-east state aser Assam nungi mezüngbuba order anguba atema pelar. Iba order ajanga onoki yangluba bus ajaklen senzür. Indian roads nung onok bus ajanga kilometer crore 5 tema senzüogo aser

carbon emissions ajemdaksüogo" ta Olectra Greentech Chairman & managing director, K V Pradeep-i ashi.

ASTC-i taruba küm 5 tsüngda Guwahati nung city bus tem electric aser compressed natural gas (CNG) agi melennür.

"Electric aser CNG bus garitem alizüktsü mapa tenzükogo" ta Transport minister Parimal Suklabadiya-ia taoba mapang shia liasü.

Assam nung nija meyong bus gari 700 shi lir aser ajak ya diesel amshir. Garitem rongnung ASTC kübok 260 lir.

Assam nung 2030 tashi nung sorkar gari ajak electric vehicles agi melentsü aser iba ya Electric Vehicle Police nung carbon emissions azüoktsü lateta aliba nung ajemdaker inyaktsü ta minister Parimal Suklabadiya-i metetdaksü.



23 Sector Assam Rifles indang Serchhip Battalion-i Venghnuai, Zokhawthar yimdak Rs 79,50,000 alang heroin gram 159 apu. Osang tejangka ka angazükba nung ajemdaker Serchhip Battalion aser Zokhawthar Police külem telok kati mita aodang international market nung Rs 79,50,000 alang heroin ji apu aser iba dak sendakba nung tetsür ka apu. La ya Myanmar kübok Khawmawi nungi Tialduhrem (43) ta jangjaogo.



TIR YIMYIM YIMOBILEM (EDITORIAL)

DIMAPUR AMUNGNÜ, RONGJUI (SEPTEMBER) 04, 2022

Metsübuli, Tsüngremi kümzüksü!

Alima nung Satan lir aser anogo shia satani asenok tendangner, ajisüaka asenok Tsüngrem den lira asenoki tsübutüsü asenok dak kecha mataloktsü. 2 Timoti 1:7 nung ashir, "Kechiyong Tsüngremi asenok nem tetsübu tanüla masü saka ain, temeim aser tangatetba agütsü." Ibaji aseni amangra, asenok taküm nung kechi atalokdir atalokang, asenoki kecha metsübutüsü. Tsüngremi asenok nem tetsübu tanüla magütsü ta asüba tetezüji, alima nung asenokibo kodanga timtem tekangshi aser shisabolutsüsa tensa mapang tamajung kecha majurutsü ta masü saka ajurutsü saka metsübutüsü. Aji oda, Tsüngrem den indangindanga jajar, ochishir aser teindang nisung dakbo tamajung agi kodanga mekongshitsü asübo Yob taküm aser par kibong dakang matalokla aser Yisu nütsüngtem aser osang tajung bener jajar tenyartem taküm nungang lendong matalokla. Ajisüaka, Laishibai asenok nem angatetdaksünübaji, lendong ajuruaka metsübutüsü. Ibaji asenok tamang jenjang asütsüla. Iba kasa tangatetba nung David chubai Tenüngsang ken 23:4 nung, "ni tasü aküm ayongküm ajanga jajaaka, ni kecha lendong metsübutüsü," ta ashiba asenoki angur. Tetezü, taküm nung lendong lir aser kibong dangia timtem arutsü, saka asenok nem Tsüngremi tasütait tanüla ka agütsütsü, anungji sentsü agi tsübanger sensak tia iaka metsübutüsü, cancer agi shirangaka metsübutüsü aser tangari anema apusoyonga metsübutüsü. Asenoki angatetsüba kaji, Satani asenok nem Tsüngrem masü saka alima lendong aser timtemang tsübudaktsüner. Ajisüaka, kodang asenoki Tsüngrem tsübudir asenoki kecha metsübutüsü saka kodang asenoki Tsüngrem metsübulir ajak tsübutüsü. Iba jagi asenok aika taküm nung makamaitba agi masü saka tetsübutüsü agi kibong raksar, tashidak tamajung asüba agi masü saka tsübutüsü agi arishi malanger, nisung tamajung asüba agi masü saka tsübutüsü agi tenükmerem adoker. Aji oda, Yisui asenok tashimaitji metet nungji, Pa alima nungi pilatsü mapang tebu dang sarasademba mapang, "Tesamatsüba chir (Iskariot Yihuda) dak alaka nai kü nem agütsüba nütsüngtem ajak nü ain nung kümzüka yuogo aser parnok rongnung kata mesamai ni nukogo...ni parnok (lendong majurutsüsa) alima nungi anir oang ta mashir saka nai parnok tamajungba nungi sotang ta ni mepishir," ta Yohan 17 nung shia aliba asenoki angur. Iba kasa sarasadem ya tanüa asenok asoshi Yisui anogo shia mepishitsüdag. Yisu alimai arudang aser alima nungi piladang asenok dang ashiba kasa o ka lir, ibaji "Tetsübu" ta asüba ya lir. Asenok shitakba Tsüngrem dak chichia jenoka ali asü maliar metettsü atema asadangtsüba scale tajungtibaji, asenok "tsübur asü metsübur" ta asüba ya asütsü. Talisa tanü ama alima ajunga nung tashidak wara tamajung agi asenok amokmerendang, asenok tsübur asü metsübur? Tsübur asenoki Tsüngremi kuli mesütettsü, kechiyong Tsüngrem ya tetsübu tanüla masü, anungji Pai asenok nem tetsübu tanüla magütsü. Tsübutüsü aliba o kumdanga aliba na ya balala lir. Tsüngremi asenok dang nungi aginübaji "Tashidak tsübutüsü ya masü saka "Kumdanga aser Mita" aliba taküm aser tanüla aginer. Asenoki tebang agibo tapu aika ashitsüa akok, saka asenok mapa aser jakla agi asenok tamang jenjang sayutsü. Aji oda, tanü asenok taküm aser temulungjang nung tetsübu lira, iba jagi asenoki Tsüngrem dak temulung melemtetba sayur. Tsüngrem dakbo amanger saka alima nung lendong timtem, makamait aser tashidakbo tsübur ta asenok tamang o tetsübu na ya külemi moutettsü. Tsüngremibo asenok dak temulung lemtetter saka asenoki Pa dakbo temulung melemtetter ta Khristan taküm ka moutettsü. Yisui anogo shia tebu dang asenok ya alima nung tetsübu nem mekokdaktsütsü asoshi mepishitsüdag ta asenoki amangdi. Aji oda, asen meketa lendong agi sünga lir ser nung metsübutüsü aser tashidak tulu agi shiranger ser nung tsübutüsü meblemra, asenok Tsüngrem den shitakba longjema lir ta asüba kuliji aji asütsü. Na tsübur asü metsübur (?) ta asübutüsü "Na Tsüngrem den lir mali?" ta asüngdangba den kasaa ta angatetdi.

OLEMSABANG

KÜM-150 SQC JUBILEE TEMOATSÜ NUNG AMUNGTSÜ RENEMA ATADI

~ L. Kika Pongener

Ao limai Khristan yimsü arur küm-150 SQC Jubilee-mong amungtsü ita ana shi dang lir. Iba Jubilee-mong amungtsü atema mungdang (ABAM) nung tenzükertemi anir, lim arogotem ajunga kanga teyongyaba tulu nung renema atadagi. Ano iba Jubilee-mong sentong tulu nungji asen Aotsür Aor dang masü 'Nagaland Baptist Church Council' (NBCC) küpok mungdangtem nungi teshimtet nubu (Delegates) aika arua adentsü sudi. Ano asen Naga lima nungi dang masü, 'Council of Baptist Churches in North East India' (CBCNEI) nungi, aser bendang lima (Foreign) linuktem nungia teshimtet nubu karbo arua adentsü sudi. Ano iba dak alaka, aseni sayua anitetba kin Arunachal ama aser tesem balala nungi asen den sendaktepa aliba kintem karbo arua adentsü sudi. Asenok ajaki metet, Jubilee ya tai tatok agütsüba, tsükchitepa aliba yimjung yangluba, sentsüh-lutem atokba, jentoka alirtema tanaben meyipa agizükba, yim o yim na inki shibanger kin mechtepi aliba akangjungshitepa yimjung yangluba aser alar-a dena salaa chiokba mapang lir. Ajisuaka, kanga tesasatsüka, asen Aotsür Aor tsüngda nung kati ka aitsütepba aser pei temeden bushitepba otsü osangtem angudang, asen o asen na tsüngda iba tia nung lia, iba Jubilee-mong ya koda-ka amungtsü (?)...ta temulongjang nung tasüngdangba aika arur. Ashiko, ni dang masü asen Aotsür Aor aika mulongjang nung yamaji asüngdanga alitsü sudi. Anungji iba Jubilee-mong temoatsü nung amungtsü asoshi Jubilee matongdangsa asen o asen na tsüngda nung taitatok agütsütepa yimjung yanglutsüla, tashimait kar lira metongshitepsüla aser ken o opang mapuba kar lira tajungtiba agi lenji-i arutepa angatettepsüla. Aji oda, iba ama Jubilee-mong sentong tulu ayongzuka yur, asen atepzüng nung asen o asen na tsüngda nungbo yimjung maka, tepela tesunep mali, yim o yim na tsüngda nung yimjung mekai, mesura telok kati telok ka den tesendaktep raksar, nutsüng-nubur tsüngda tako-tasen chiteper, aser kati ka nem tai tatok magütsütepi iba Jubilee-mongji mungra, ashiko temoatsü kangabo mangutsü sudi. Asenok temoatsü mangutsübutüsü oda yutsür, asen atepzüng nung asen nubur tsüngda opang mapuba/meputepba otsü osangtem tangar bendanger kintemi angashidang, alima matsüngdang asen Aotsür Aor maksu tulu asütsü ta tsüremseta bilemer, aser iba SQC Jubilee amungba ya kecha tetezü/tajangzük makatsü. Ao kinji Naga nungger ajak lennir aser maparen ajunga nung 'Mezüngpur' (Pioneer) ta alimai jembiba, iba konang naroküm ya ali tur aremtsü. Anungji asenok Tsüngrem tsüngdang sentsüh-tsür masütsüsa, asen chirnur/semchi-semnur asoshi temoatsü agizüker asütsüsa, aser Ao kin asoshi dang masü Naga nungger kin ajak asoshi iba Jubilee-mong ya temoatsü anguba benjong-mong ka asütsüsa, kati ka nem tai tatok agütsüteper, tashimait kar lira metongshiteper, asen o asen na tsüngda nung yimjung yanglur iba Jubilee-mong ya amungtsü renema atadi.

Tejen putu mapang nung Jubilee küm, linuk nung nubur ajak dang nuji tia sangoktsü aser nisung kar alar asütsü sen yong yoka lira, parnokjia pei kinunger dangi meyipa yokba asenoki laishiba nung angur (Levi-25:10-11) nung zünga angutsü. Asenok mimchir iba temenen lima nung alidang tejen sobaliba yimsü-ozüng tamajungtem aika agi alenbanger nuji tia mekai lia, asen Kümtetdakba Yisu Khrista alimai arur, pai tejen yimsü ozüngtem aika melenshidaktsü. Yisui ashi...Ya ashiba nenoki angashiogo, "Tenuk melen tenuk, aser tepu melen tepu. saka ni nenok dang ashir, "Tamajunger den terara, saka shibai ne tenibong tajichi nung madir, pa tsütsü tabelenjia tendakang. Aser kati ne den okai ora, aser ne supoksu aginura pa nem sua agidakjang. Aser shibai na mile ka jajadaktsünur pa den anasü oang. Shibai ne dang meshir pa nem agüjang, aser shibai ne dang apunudir pa nungi ne tejak temeyip. Nenok tsükchirtem dang meimang aser shiri nenok reshikangshir parnok asoshi sarasademjang" (Mat-5:38-45). Yisu alima nung alidang, Peteri Yisu dang asüngdangba otsü ka yamai angur, "Kü adianui ni anema tai menara ni pa dang kwiben tai atoktsü? Tenet-ben tashi asü? Yisui ashi, Tenetben tashi ta ni ne dang meshili, saka neterben tenet tashi" (Mat-18:21-22). Yisui shinubaji tatakzük (Condition) kecha mekai aiben dang tatok agütsütsüba indang ashiba sudi. Atangji kati ka nem tai-tatok agütsütsübutüsü Yisu Khrista tesayuba lir. Anungji asenok pa dak amangertem pai sayuba ama alitsü aser pa jilo ajizüker ka-ka asütsüla.

Anungji joko asenok tejen sobaliba yimsü ozüng nem alendaktsür, ozüng küpok alar ama kümer melili. Tsüngrem oi ashir, "Nujiba asoshi Khristai asenok nuji kümdaktsüogo. Anungji akangakanga nokdakang aser joko tanaben alar tapuba sungra nung tapu" (Galatia-5:1). Yisu Khristai asenok nem iba lima meyong senso masü, saka teti tatem maka kotak senso tekümtet renemtsüogo. Anungji asenok Yisu Khrista dak amangertembo iba temenen lima nung senso akümtsü bushirtem masü, iba lima nung konang-nungsang bushirtem masü, iba lima nung tamapur/mezüngpur jenjang bushirtem masü, saka kotak senso akümtsü bushirtem lir. Tsüngrem oi ashir, "Saka asen senso kotak nung lir, aser ano idak nungjagi kümtetdakba ka oda Kibuba Yisu Khrista arutsü aji asoshi asenoki atar" (Filipi-3:20). Yisui ashi, "Saka nenok rongnung shiba tulutiba lir pa nenok tenzüker asütsü. Aser shibaisa pei sasa uludir pa tila akümtsü, aser shibaisa pei sasa tila kümdir pa ulutsü" (Mat-23:11-12). Yisui ashiba ama asenok ajemalua tila akümtsü angazükdi.

Temeim Aotsür Aor amangbapur tajungtem, küm noklang ka ser tenem tashi amanga arur, asenok tang ni tuluba, ni tazüngba, ni tamapur, ni mezüngbur...ta asüba iba tejen yimsü sobaliba nung soiter, iba tangatetba nungji nisung kar dang lira, arung iba shisatsüjibo endokdi. Jokorla, Yisu Khrista dak amangertembo, alima senso nung tamapur/mezüngpur arishitsüba mapang masü, saka kotak senso nung tamapur/mezüngpur asütsü arishitsüba mapang lir. Anungji asenok kati ka aitsütepa melili, saka ajemalua tila kümer, asen jakdang aruya-a aliba Jubilee temoatsü agitsü yongya-a atadi. Shirnoki iba temoatsüji magitetsüsa tamajung nung tekong merangdir, Tsüngrem tsüngdang sentsüh tulu asütsü. Aji oda, iba ocet nung nisung kar temulung yirutsüsa zülusema lira metongshia agitsü mepeshir.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir

IS-i asentenshir Khristantem anema apusotsü ayonger



Tamalen Islamic State (IS) kiralongrartemi Khristan 21 tekolak tangzüka lepsetba sülen Egypt nung Coptic Khristantemi alima linüktem dang IS anema raratsü teyari meshia longkak aitba noksa nung angur.

September 03, 2022: Tesüiba ita ana tsüngda Islamic kiralongrar telok Islamic State (IS)-i Arabic masüba oshitem nung Khristantem anema olulu prokba video balala prokshio. June 14, 2022 nü West Africa Province nung IS-i Hausa oshi nung video ka proka liasü; iba oshi ya West Africa aser Central Africa nung nütsüng teimba aliba lisopurtem oshi lir. July 1, 2022 nüa Iraq nung IS-i Kurdish oshi nung video ka prok; iba oshi ya Iraqi Kurdistan, north & east Syria aser anüdoklen Turkey nung jembir. Maneni July 30, 2022 nü Somalia nunga IS-i Ethiopia indang official oshi- Amharic nung video ka prokogo. Iba video ji ajanga Ethiopia nung Khristantem aser sorkar anema Jihad rara ayongzüksü ajungshia lir. Maneni August 3, 2022 nü Khorasan Province (greater Afghanistan) nung IS-i Khristantem, Yihuda nungertem, Hindu aser Shi'ite nung tekülem kitem amaktsü ayongzü. Ethiopia kübok Somali region nung IS kiralongrartem amakba sülen hopta ka dang lirbo Amharic oshi nung video ji prokshia liasü.

'On the Path of the Conquerors' ta asüba video nungji Arabic oshi nunga meyipzükja lir aser kiralongrar Abu 'Isa Al-Ethiopi-i Khristantem anema inyaksü ayongzüka lir. Abu 'Isa-i Horn of Africa nung Muslim aser Khristantem tsüngda küm 1,400 tashi raraa aruba puti otsü lemsatapa lir. Abu 'Isa-i, Abyssinian Khristantemi Islam yimsü sendokba dang masü saka mapang ajak nung Muslim nung smpar aser Muslim nung anema inyaker, ta metetdaksü. Paisa, Aso 17buba mapang nung Muslim nungertemi jihad rara anenba sülen Khristantem jenjang tajungba aküm tenzüka liasü aser tanübo Khristantemi Ethiopia yimsüsüba ajanga nisungtemi Allah yimsü toktsür, ta ashi, Paisa Ethiopia nung Muslim tem dang Islamic State-i azioka aliba tesemi arua pei yimsü atema raratsü ayongzü. Nenoki IS tesemi marutetra nenok aliba tesem nung mamangertem (Khristantem) anema raratsüla, ta tayongzüka agütsü. Nigeria nunga ISWAP-i Hausa oshi nung Muslim nungertem dang IS aliba tesemi arutsüla, kechiyong onoki

nenok kümzüksü, ta sangdonga liasü. Tang Nigeria nung Islamic kiralongrar telok tulutibaji ISWAP lir. August 8 nü IS-i English aser Arabic oshi na nung 'Harvest of African Christians' ta ser poster ka saya, aser iba nungji parnoki taküm June aser July ita na nung Tenla ki 13 rongdoktsüba den Khristan 190 tepsetba atema teyaksanga jembia lir. Tang kiralongrar teloki DR Congo, Mozambique, Nigeria aser Cameroon linüktem nung Khristantem samatsütsü nükjiding yur inyaker. Ano külen Iraq aser Syria na nung IS-i security tensa raksatsütsü meranger. Parnoki Kurds nung tsüngda telemsa adokdaksütsü aser Islamic Kurds nung telok nung anioktsü meranger; ibaji atalokra Iraq aser Syria na nung Khristantem kanga reshikangshitsü. August 3 nü Islamic State's Khorasan Province (ISIS-K)-i Iran, Afghanistan aser Central Asia (Khorasan Province) nung Khristantem, Yihuda nung aser Hindu nung indang tekülem kitem amaktsü tetuyuba agütsü. Iba tetuyuba agütsüba sülen Afghanistan yimtiba, Kabul nungbo Shi'ite nung mosques aika maakogo.

China nung Communist party-i Khristan App ka shibangtsüogo

September 03, 2022: China nung Catholic Khristantem atema yangluba CathAssist App taoba hopta Chinese Communist Party (CCP)-i shibangtsüogo; company-i iba app maneni amshitsü atema China sorkar ket nungi license meshiaka mangur, ta International Christian Concern (ICC)-i osang ka ajanga metetdaksü. CathAssist team-i, "March 1 nü ozüing tasen aika benokba mapang nungi onoki Internet Religious Information Service

License meshitsü atema meranga liasü. Onoki iba app ajanga 'share' asüba anen, nungja melen aser iba app nung aliba aika melenshi, ajisüaka iba app maneni amshitsü atema license mangu. Iba app license atema app nung aika indoktsüsa akümer," ta metetdaksü. North China province nung Khristan kati, ni mapang talangka nungi iba app amshia aruogo saka August 24 nungi iba app ajanga mapa meinyaker, ta metetdaksü.

Iba app ketdangtsüba company tetshia pai, "Iba app license angutsü atema parnoki ita aika meranga inyakogo saka tamakok angubayong iba app shibangogo," ta metetdaksü. Paisa, "Anogo shia ni CathAssist app ajanga putiri Laishiba rasaa ashiba anga aser tanela chiyungtsü balala ngua liasü," ta metetdaksü. China nung tang Catholic Arogo anema inyakba dak sendakba nung iba app shibangtsür.

ANOGO ABEN TSÜNGREM DEN

NA TIYAZÜ TESAYUR AINKAR ASÜ

"...yamaji nenok rongn unga tiyazü tesayurtem adoktsü...pei sasa dak aoksa tesamatsü bener arutsü." (II Pt. 2:1)

Kodang tiyazü ainkartem mesüra tiyazü tesayurte ta südir, iba ya aikati Khristan yimsü dak mamanger mesüra Khristan tamangba yimsü madak matenba (cult) lenir telok kar ta bilemer. Saka, II Peter nungji Paul-i tiyazü ainkartem aser tesayurtemji shirnok kanga junga zülua aliba angur. Parnok ya amangbapur nungi dang lir. Item ainkartem aser tesayurtem ya asen Tsüngrem osang abenertem liasü.

Tiyazü ainkar tesayur ta asübaji talisa parnoki ashibaji tiyazü ta masü saka parnok mapaji tiyazü. Ibayongji II Peter 2:2 nung ashir, 'Aikati parnok jabujari mapa sülen anitaktsü, parnok atema ochi lenmangji atalatsü.' "Parnok jabujari" ta asüba ya tenzüker shirnok tema tazütsü ka dang alir, pai jembiba aser inyakba na meputep, item indang ashirba lir. Asenoki tenzüker kar kanga jaretpera keta kanga tiyakyak angur, saka ibaji tema tereprangtsü dang. Mapa aser tejembiba balala süra ochiba atalatsüba lenmang nung jajaba den kasa lir. Anungji item lenmang nungi asen jenbua alitsü koda tenüngdaktsü.

Nai jembiba mesüra sayuba ama melira, na tiyazü ainkartem aser tesayurtem rongnung adener. Asenoki item tsüngsü nung mejajatsü merangdi. Kechi Tsüngrem O nungi angazüker aser aseni koda sayur iba amaji altisü merangdi.

SARASADEM:
Kibuba, ni na asoshi dang linür, ne tesayuba ama alitsü nai ni yariangma. Amen.

East Africa nung ayawara anema linüktemi teyari peria magütsür

September 03, 2022: tetsürtem tamajungba Tang East Africa nung kongshir," ta ayawara tebilemtsü metetdaksü. Raraba tensa, tzümetsüng, litem lima nungi aruba süngko, coronavirus wara aser jenjang atuba ajanga region nung chiyungtsü agi kanga anünger. Christian Aid-i, tang iba ama tensa nung timtemertem peritsüsa alima linüktemi teyari peria magütsür, ta metetdaksü. Fazal-i, "Nisung ajak chiyungtsü agi peritsüsa aliba lima ka nung nisungtem aya agi asür. Tang ayaba agi tesüdakpurtem yaritsüji kanga tongtibangtiba mapa lir. Tang teyari agütsüba dang nungi teimba agütsütsü nüngdaker," ta metetdaksü. East Africa nung timtemertem khuret pungbatsütsü atema Christian Aid-i Kenya, aliba tesem bushia aoer. Ethiopia aser South Rara aliba tensa den Sudan nung partner külemi chiyungtsü agi organizations den anüngba ajanga senteper inyakdar.

OLONG PAITEP # 6281

1		2		3		4	5			
				6						7
		8								
9				10		11				
			12					13		
						14				
16										
						17				

TIPILEN		LANGTSÜNGLEN	
1. Nisung jenti	- (5)	1. Tenük telong	- (9)
4. Tsük rudenba	- (5)	2. Committee dang ajar	- (5)
6. Temzüng tesashi	- (5)	3. Yagi ki okdoker	- (7)
8. S _ _ _ i	- (3)	5. Yim lenmang	- (5)
9. Nisung telemsa	- (3)	7. Temoatsü keter meyipa aruba	- (9)
10. Anogoshi	- (4)	11. Kanga junga menemba	- (7)
12. Ajanga aor	- (4)	12. Majinü	- (5)
13. Tsük rizüngdak	- (3)	13. Tzüma nung senzüba	- (5)
14. Tebang nungi adokba	- (3)		
16. Süngdong tatembangtiba	- (5)		
17. Mepupet	- (5)		

OLONG PAITEP # 6280 TELANGZÜBA

TIPILEN :		LANGTSÜNGLEN :	
1. Ayawara, 4. Aja, 6. üata, 7. Sasa,		1. Azüita, 2. Aitsü, 3. Awatsüng, 4. Ara,	
9. Tzülu, 10. Süin, 12. Teki,		5. Aren, 8. Lumiseta, 11. Tazüng,	
13. Nunga, 16. Osen, 18. Aksü,		14. Noksa, 15. Tera, 16. Oru.	
19. Apu, 20. Alimang.			



ALOKBA ELECTION-I AINUNGBO TEYARINÜR ONSARA

Sobang : Hoi...Temba na Electioni aitsü tebilemba lir ama angashir...Na aitsü sura ni ne 'Chief Agent' asütsü...Kü nem sen lakh-20 agüjang.

Polokba : Hai...Tulur na Election-i aitsü ta angashi...Ozü Group-i Polling Station ishika-bo Coup asütsü...Kü nem sen lakh-10 agüjang.

Warakla : Hoi...Tulur na Election-i inur amai angazük...Ni Proxy Vote Incharge asütsü...Kü nem sen lakh-5 agüjang.

Watsüla : Hai...Tulur na Electioni aitsü sura...Ni Mahela Leader asütsü...Kü nem sen lakh-5 agüjang.

Alokba : Hai...Tembartem sen lakh ya ola adoktsübo temela...Saka bener arutsübo tasak ako...Anungji asen sasa asen seret odanger dang ola adoktsüla ako.

Oboula : Ena...Semchir parnok ajakji sepla-sepshiba nisung dang ako ...Kechisutsü asen sen agi tangar takar kümdaktsütsü...Electioni aiba ya alar akümtsüba ayir ako...aser tatempang nungbo sentsüh agi tsübanger atemtsü...Anungji Electioni aitsü melena aseni bendena akaba sen jagi ki tulu kar yanglur iba para (rent)-ji chia ayung-ayunga dang liang.

- Lilir : L.Kika Pongener.

TANÜBO NAI LANGZÜANG

Q. Koba Union Ministry-i 'Smart Solutions Challenge and Inclusive Cities Awards' agütsü?

[A] Ministry of MSME

[B] Ministry of Housing and Urban Affairs

[C] Ministry of Commerce and Industry

[D] Ministry of Science and Technology

—————(Taruba adok nung onoki langzütsü)

YASHI ADOK TELANGZÜBA : New Delhi

AO OSHI ANGAZÜKDAK:

TANÜ ANGAZÜKTSÜBA OJANG

Nidongro
(n) anüngdang tajung salem o (good afternoon)

Nikongdang
(n) anü aitsü anasa mapang (evening)

* **Nikongdang** nisungtem mapa nungi meyipa arur.



Tanur asoba anogo nung salem osang den noksa angati adokdaksünöra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

NAI-A YA METETTER MA

- SEPTEMBER 04 ANOGO ASOR TONGTIBANG NISUNG KAR:**
- French novelist/politician Francois Rene de Chateaubriand (1768)
 - U.S. first lady Sarah Polk (1803)
 - Architect Daniel Burnham (1846)
 - Engineer/inventor Lewis Latimer (1848)
 - French composer Darius Milhaud (1892)
 - Novelist/essayist Richard Wright (1908)
 - Golf Hall of Fame member Raymond Floyd (1942)
 - Actor Judith Ivey (1951)
 - Comedian Damon Wayans (1960)
 - Music producer Mark Ronson (1975)
 - Singer Beyonce Knowles Carter (1981)
 - Comedian/actor Kyle Mooney (1984)
 - Singer James Bay (1990)
 - Actor Talitha Bateman (2001)

SUDOKU # 6320 **TELANGZÜBA # 6319**

6	7	9	3						2	7	6	9	4	1	3	5	8		
4			7	9	2			6		4	9	8	3	7	5	2	1	6	
	1		5	8	6			4			5	1	3	6	2	8	7	4	9
		8									6	3	4	8	9	2	5	7	1
		3	1	6	8	2	9	7			9	8	7	1	5	4	6	2	3
2	7		5	9	3						1	2	5	7	3	6	8	9	4
						9					7	4	1	2	8	3	9	6	5
8	5		9	2	1						8	5	9	4	6	7	1	3	2
9	3			4	7	5	8	2			3	6	2	5	1	9	4	8	7

OJANG LUTEP # 5866

JUTANG :

KTETINYABA :

UNSERNG :

CHIBKEA :

METEONGTSÜMA :

SÜBMAA :

AMAP :

NGA :

AKTINYSÜ :

RAJANGR :

OJANG LUTEP TELANGZÜBA # 5865

TETOKTEPER JENTI ALITSÜ AKOK SAKA TAJUNG TIBA JAGI TEMABA JENJANG AJANGZÜKTETER

TAN HOPTA ATEMA - KOMA SÜLA ?

Q. Akhidang ama, Nagaland nung National aser State Highway anogo shia repranga anepalutsü atema mapa inyaker 'regular labour' shima ayu nunga koma süla ?

Lok Sabha election atema opposition longjemtsü: Nitish Kumar



September 03, 2022 nü Patna nung Bihar Chief Minister Nitish Kumar, Janata Dal (United) Tir, Lalan Singh, Parliamentary Board Chairman, Upendra Kushwaha aser tangartem JD(U) National Executive senden nung adenba noksa nung angur.

New Delhi, Rongjui/September 03 (Agencies): Manipur nung Janata Dal (United) nungi MLA pongui party toktsür Bharatiya Janata Party (BJP) nung adenba sülen anogo ka lir Honibarnü Bihar Chief Minister aser JD(U) lenir, Nitish Kumar-i, iba ya linük temzüng den tapet asü?, ta asüngdang.

Paisa, 2024 Lok Sabha elections atema opposition longjemtsü, ta metetdaksü.

"Onoki NDA toktsüba mapang nung Manipur nungi ozü MLA trokprongla arua onok ajurua liasü. Parnoki parnok maneni JD(U) nung lir ta ashi. Ya kechi atalokerar onoki shisadangsü nüngdak. Parnoki

(BJP) party balala nungi MLA tem piladaksür, iba ya linük temzüng den tapet asü?" ta chief minister, Nitish Kumar-i asüngdang.

Legislative Assembly Secretariat-i sangdong ka ajanga, JD(U) MLA pongu BJP den adenbaji Manipur Legislative Assembly Speaker-i pelaa agizükogo, ta metetdaksü.

JD(U) toktsür BJP nung adenba MLA pongui Kh. Joykishan Singh, Ngursanglur Sanate, Md. Achab Uddin, Thangjam Arunkumar aser LM Khaute nung lir.

Taküm Manipur state assembly election nung BJP-i menden 60 nungi 32 nguteta

liasü. Iba jakdang Arunachal Pradesh nunga JDU MLA temi party toktsür BJP nung denogo.

Tang assembly menden 60 aliba Arunachal nung BJP MLA 49 kümogo.

JD(U)-i taruba Lok Sabha election nung opposition telongjem nungi Ato kilonser candidate ji Bihar Chief Minister Nitish Kumar südaksütsü tebilemba aliba mapang ka nung Janata Dal (United) senden anogo ananü senden Honibarnü tenzükogo.

Iba senden nungsa opposition party tem longjemtsü atema jembitsü ta osang angazüker.

BJP tedoktsü saka telung nungi AAP atema inyakang: Arvind Kejriwal

Rajkot, September 03 (Agencies): Honibarnü AAP tongti lenir aser Delhi chief minister, Arvind Kejriwal-i Gujarat nung BJP nung inyakertem dang, nenoki BJP metoktsüyonga AAP party atema inyakang, ta metetdaksü.

Kejriwal-i, BJP nung inyakertem BJP nungi maneni sen angutsü saka telung nung AAP atema inyakang, ta mepishia metetdaksü.

Taküm Gujarat nung assembly election agitsü lia anogo ananü Gujarat semdangba tatembangbuba anogo nung Rajkot nung lokti den jembidang Kejriwal-i, state nung AAP sorkar aruba sülen BJP nung inyakertemia AAP-i nangzükba tajangzük ajak angutsü, ta ashi.

"Onoki BJP lenirtem

menügdaker. BJP-i lenirtemji ayutsü akok. Yimtsüngtem, booth level aser talukas nung BJP nung inyaker aika onok den dendar. Parnoki küm aika party tenzükba atema BJP-i parnok nem kechi agütsü, ta ni parnok dang asüngdangner," ta pai asüngdang.

Kejriwal-i, BJP-i party nung inyakertem nem angati shisaliok magütsü, healthcare service aser electricity angati magütsü, saka AAP-ibo parnok atema inyaksü, ta ashi.

"Nenok (BJP nung inyakertem) iba party nungji maneni alitsü akok, saka AAP atema inyakang. Nenok aika taa angur, anungji parnok dang nungi taa agiang saka onok atema inyakang, kechiyong onok ket nung sen mali," ta pai metetdaksü.

"Kodang onoki sorkar

kümdir onoki electricity angati agütsütsü. Onoki nenok nem anogo nung ghonda 24 electric light agütsütsü aser nenok chirnurtem atema school tajung süja angati shisaliok agütsütsü. Nenok kibong züngsemtem nem angati medical treatment tajung agütsütsü aser kibong shia tetsürtem nem ita shia allowance sen 1,000 agütsütsü," ta pai nangzük.

Kejriwal-i, nenok BJP nung maneni alitsü menügdak aser küm 27 yimsüsüba sülen maneni parnok nem takok ngudaksütsü menügdak, ta ashi.

Tawa Gujarat AAP general secretary, Manoj Sorathiya amakba dak sendakba nung pai, Manoj Sorathiya amakba ajanga BJP kodamasüba kuli sayur; AAP ya Congress masü, anungji BJP-i AAP amokmeren mesütetsü, ta ashi.

India nung temesepba mozü aser yi ajanga soseta asür 10,000 liasü

Bengaluru, September 03 (Agencies): India nung temesepba mozü achir aser yi ajemer teimba dang akümba mapang nung 2021 küm linük nung soseta asür nisung 10,000 dak temabo temesepba mozü achiba aser yi ajemba den sendaktepa liasü.

2021 küm India nung temesepba mozü achiba aser yi ajemba dak sendakba kuli ajanga soseta asür 10,560 liasü aser ibaji 2020 küm dang nungi shilem 15 agi teimba lir.

2021 küm mozü aser yi dak sendakba ajanga soseta asür shilem 78 bo state pongu-Maharashtra, Madhya Pradesh, Tamil Nadu, Karnataka aser Kerala nungi dang liasü.

Tesüiba küm ishika yi aser temesepba mozü dak sendakba ajanga soseta asür teimba aliba state ji Maharashtra lir. 2015 küm Karnataka nung parnok ama soseta asür nisung 100 dang nungi tajemba liasü saka tangbo aika kümogo. Madhya Pradesh, Tamil Nadu aser Kerala state tem nunga mozü aser yi dak sendakba agi soseta asürtem teimba-teimba dang akümer.

Psychologists aser

psychiatrist temi ashiba agi, mozü aser yi lar akümba ajanga tatembangbuba telemtetbaji (soseta asütsü) agi asütsü akok. Iba dak alia shisatsü nung timtem, kibong tebilemstü khuret balala aser senotsü timtem ajanga parnoki soseta asütsü telemtetba agi asütsü akok, ta parnokisa metetdaksü.

"Soseta asübaji kuli ka kija ajangabo masü. Teti agia kuli balala ajanga lir. Temesepba mozü aser yi lartem mapang talangka achi-ajemba ajanga tepela melidaksür. Tatalokba aika nung tebilembaji soseta asütsü atema masü saka melung anisüngzüktsü atema temang nung yirutsütsü atema peisasa inyaker saka tia makai süadoker," ta psychiatrist kati ashi.

1995 küm nungi sorkari yi ajemba aser temesepba mozü achiba dak sendakba nung soseta asüba osangtem bendener. 1995 küm nungji item kuli ajanga soseta asür 745 liasü saka 2016 küm nungibo teimba-teimba dang akümer.

2021 küm mezüng item kuli ajanga asür 10,000 dak tema akümer.



September 03, 2022 nü south Delhi nung Aam Aadmi Party (AAP) MLA, Saurabh Bharadwaj-i Municipal Corporation of Delhi (MCD) school ka semdangba mapang pai tanurtem den jembidang tangokba noksa nung angur.

No asodang tanur asüba atema-a maternity leave anogo 60 agütsütsü

New Delhi, September 03 (Agencies): Sorkar mapa inyaker tetsürtem tanur asodang tanur süadokba mesüra tasü asoba atema-a special maternity leave anogo 60 agütsütsü telemtetba agiogo, ta Centre sorkari metetdaksü.

Iba ama leave agitsü dak sendakba nung 'stillbirth' teratetji- tanur tasü asoba mesüra tebok nung hopta 28 abensaba sülen süadokba lir.

Department of personnel and training (DoPT)-i sangdong ka ajanga, tanur tasü asoba dak tatalokba atema-a sorkar mapa inyaker ka nem maternity leave agütsütsü asü magütsütsü, ta tasüngdangba aika parnok dangi arua liasü, ta metetdaksü.

DoPT-i health & family welfare den iba dak sendakba

asüngdangtepba sülen sorkari telemtetba agi.

DoPT-i, tanur tasü asoba mesüra tanur asodang tanur süadokba mesüra sozükli süadokba ajanga tetsü ka shisatsü nung mejungi kongshir, ibayongji item ama tetsürtem nem maternity leave anogo 60 agütsütsü telemtetba agiogo, ta metetdaksü.

Ajisiüka iba leave ya sorkar mapa inyaker tanur ana dang alir mesüra sorkar hospital nung asor mesüra Central Government Health Scheme (CGHS) nung empanel süa aliba nija hospital nung asor tetsütem nem ang agütsütsü. Emergency delivery atema empanel süa maliba nija hospital nung tanur sora 'emergency certificate' agütsütsüla, ta DoPT-i metetdaksü.



September 03, 2022 nü Kolkata nung India-Bangladesh transshipment cargo service tenzükba anogo nung rong ka nung khu oshiketba noksa nung angur.

Pakistan tzümetsüng lendong nung asür 1,265 jungogo



Islamabad, Rongjui/September 3 (Agencies): June ita tom nungi Pakistan nung tzunglu kanga sashia aruba aser tzümetsü aruba ajang nisung 1,265 süogo. Rongsenketzüng jenjang kanga mejungi kümer aliba linük nung tang tzümetsüng agi nisung aika pei talidak ki toktsür aotsüsa akümba sülen parnok nem teyari agütsüsu atema kanga kangshitedar.

National Disaster Management Authority (NDMA) sangdong ka ajanga Honibarnü ashiba agi, taoba ghonda 24 tsüngda tzunglu kanga sashia aruba ajanga adokdaksüba tzümetsüng lendong nung nisung 57 süogo aser nisung 7,683 yiruogo, ta Xinhua news agency sangdong ka ajanga metetdaksü.

Pakistan nung tang tashi nung nisung 12,577 yiruogo.

NDMA-i ashiba agi, taoba ghonda 24 tsüngda asürtem rongnung tanur 17 aser tetsür 18 densema lir.

June ita tom nungi tzümetsüng ajanga linük timtemi idaksüba sülen tang tashi nung ki 1,427,039 shi raksaogo aser kiset shiruru 735,584 taküm samaogo, ta NDMA-isa shisem.

NDMA-i ashiba agi, iba mepetmesü tenzükba sülen tang tashi nung nisung 169,676 kümzükogo aser nisung 627,793 camp balala nung jenoka lir.

NDMA, sorkar agencies balala, volunteer aser lokti tentet balalai ayongzükba tekümzükba maparentem tzümetsüng agi kongshir aliba tesemtem nung maneni benoka

inyaksangshidar.

[6:01 pm, 03/09/2022] NUKSHI TYY: Kohima Law College aser IDIA na tenangzüktepba ka yanglu Dimapur, Rongjui/September 3 (TYO): September 1 nü Kohima Law College aser Increasing Diversity by Increasing Access(IDIA) Charitable Trust na tenangzüktepba ka yangluogo.

IDIA indang office headquarter ya Bengaluru, Karnataka nung amenoka lir aser parnoki tangar ama maongka peria mangoba kaketshirtem nungtugu obendanger aser community advocates tem kümdaksüsu atema inyaker.

Kohima Law College-i, student volunteer body ka amenoktsü atema IDIA nem teyari agütsüsu mulunga agizükogo, koba IDIA indang official "Nagaland Chapter" ama inyaksangshitsü. IDIA project ya India kübok tesem balala nung law school tem nungi kaketshir volunteer tem dak metaloker inyaksangshir, shirnoki law azüngtsü atema sempet aliba tekübokba jenjang nung aliba kaketshirtem bushia senzür.

IDIA kübok State Chapters 25 shi lir. Chapter ajak nung state kübok law school balala nungi kaketshirtem team lenir kati anir kaketshir volunteers 20 nungi 30 tsüngda alir. Parnoki pei state nung school balala nung sentong balala ayongzükba agir aser law azüngtsü atema sempet aliba tekübokba jenjang nung aliba kaketshirtem

shimmer aser CLAT aser tanga tatidang atema renemtsür aser parnok law college temi aiba sülen len sayur. Iba sülen IDIA-i teshimetba kaketshirtem nem India nung law entrance tatidangtem atema tesayuba balala agütsür. Law school tem nung züngoksema sülen IDIA-i item kaketshirtem atema sponsorships/scholarships aser mentorship schemes balala achaayangja teyari agütsür. India nung law school/university tajungtem aikati IDIA kaketshirtem dang tah magi züngdakja arudar.

Asst. Professor Kezhokhoto Savi-i IDIA indang yimyim; Why Legal Education? Indang teteshia jemi. Law ya kanga tashi tait hadir ka koba tekübokba jenjang nung aliba lokti temia sector balala nung mapai aitsü atema kakets shisatsü angazüktsü asoshi benoka inyaksangshitetsü. Sector tem rongnung courts (litigation), law firm tem, company balala, international organization tem, human rights & social activism, policy think-ranks, research & academia, aser legal journalism amala densema lir. Iba ajanga ano maongka peria manguba lokti nungi kaketshir kati advocacy tasatem arangshitetsü aser iba ajanga parnok ya tetangshi lenir kaka aser lokti atema otongdarterem kümtetsü, ta pai ashi.

Caption ; September 1 nü Kohima Law College aser IDIA Charitable Trust na tsüngda tenangzüktepba yangluba noksa nung angur.

Taoba Sri Lanka tir Rajapaksa aputsü akhanger

Colombo, Rongjui/September 3 (Agencies): Taoba Sri Lanka tir Gotabaya Rajapaksa shiba kangshia mapa toktsüdaksü, pa Honibarnü sorkar tekümzükba kübok linüki meyipa aruogo. Sri Lanka nung ita aika nüburtemi sorkar anema longkak aitba sülen July ita nüburtemi tir ki amakba sülen Rajapaksa ya military-i teyari agüja linük nungi jena ao.

Arishi küm 73 tain taoba tir yagi pa mapa toktsüba Singapore nungi sangdonga liasü aser pa linüki meyipa arutsü atema pa melenzükertem nem telemtetba ka agidaksüsu meranga Bangkok nung hotel ka nung hopta ishika jenoker liasü.

Rajapaksa-i aniba sorkar atsüngtokba longkak aiterem rongnung lenirtemi ashiba agi, pai office toktsüba sülen presidential immunity samaogo aser pa obendang daki anri arutsü nungdaker.

"Gotabaya meyipa aruogo, kechiyong linük kati danga pa agizüktsü memulunger aser pa tatsükdak makai kümogo," ta teachers' trade union ka nungi lenir Joseph Stalin-i AFP dang ashi.

"Sri Lanka nung aliba nütsünyongsük million 22 timtem tekangshi tului idaksüba atema pa tangsa tang aputsü nungdaker. Pa aibelentem atema obendangtsüla," ta pai ashi.

Sri Lanka rongsenketzüng kanga mejungi küma aoba mapang ka nung rongsenketzüng shidak achaayang masüba atema Rajapaksa-i aniba sorkar aija arudar.

Sri Lanka rongsenketzüng kanga mejungi akümba sülen linük nung chiyongtsü agi anüng tenzük, electricity jenjang kanga mejungi aküm aser totzü agi kanga anüngba ajanga nüburtem totzü alitsü atema mapang talangla atatepa liasü.

"Kecha matalok ama pa sadem sadema melitetsü," ta Stalin-i ashi.

Rajapaksa, Colombo nung international airport tongtiba tonga aruba sülen minister aser yimden yimsüsürtem densema pa agizüktsü ata alirtemi narozük azükja pa agizüka liasü.

Pa security convoy kati miner linük yimtiba nung pa

melensang tir Ranil Wickremesinghe-i aniba sorkari agütsüba ki tasen kati anir ao.

Rajapaksa tenu tanobosang Basil, shiba taoba mapang finance minister liasü, pai Wickremesinghe den taoba ita ajurutepa teti linüki meyipa arudaksüsu atema tekümzükba agütsüsu mepeshia liasü.

Rights activists temi Rajapaksa anema ken o aika benoka pa obendangtsü nangzükler lir, kong 2009 küm nungtugu osang kaketa indang yimo zülur Lasantha Wickrematunge tepsetba densema lir.

"Pai linüki meyipa arutsü telemtetba agiba onoki pelashishia agizükler, ajita asünung dang pai menaba aibelentem ajak obendangtetsü," ta Sri Lanka Young Journalists' Association otongdar Tharindu Jayawardhana-i Hokolbarnü ashi.

Rajapaksa tir asütsü shimba sülen pa anema ken o benoka aliba aika bangdaka ayu.

Kasa mapang nung Wickrematunge tepsetba aser 2009 küm linük nung civil war tembangba sülen Tamil nungger tepuokertem rishikangshia amshiba atema US nunga Rajapaksa anema ken o benoker lir.

Rajapaksa-i 2019 küm election nung takok tulu angu, saka linük nung tebilemstü tamajungba küma aoba sülen pa jenjang kanga mejungi aküm.

Pai aniba sorkari saru ajemtsüba atema aitsüogo, koba ajanga sorkar sentsüh tali kümdaksü aser linük rongsenketzüng kanga mejungi aküm.

Maneni coronavirus wara poktetba ajanga linük indang tourism industry nung kanga mejungi kongshi aser bendanglen aliba Sri Lanka nungertemi senotsü teyari agüja aliba kongatok, koba foreign exchange nung kanga tongibang lir.

Rajapaksa indang term tembanga abentsü atema parliament-i Wickremesinghe shimogo. Pa tir akümba sülen longkak aiterem tashiyim agi azüokba den activists tongtibangtem pua arudar.

Colombia nung police officer tenet pokset

Bogotá, Rongjui/September 3 (Agencies): Colombia anüolen bomb amshia police office tem amakba sülen officer tenet tepsetogo, ta tir Gustavo Petro-i ashi. Office mapa belenzükba mapang linük küm 60 shi mepetmesü nung aruba tembangtsüsu nangzükba sülen Petro-i mapa agizükler tang lendong tuluba atalokogo.

Police sources-i ashiba agi, officer tem ya Hokolbarnü parnok senzua aliba gari

pokdaksüba sülen tepseta liasü.

"San Luis, Huila nung bomb amshia police maka officer ti tepsetba ni aitsür. Asür kinungertem den asükhu lemsateper," ta Petro-i Hokolbarnü tweet asü.

"Item inyakyimtem ya yimjung anema lir. Ni ketdangsurtem dang iba tesemi oa bushisüngdangtsü metetdaksüogo," ta pai ashi.

Petro ya taobs mapang M-19 rebel movement züngsem

ka lir aser pai taoba Revolutionary Armed Forces of Colombia (FARC) den 2016 küm yimjung atema accord ka yangluba (iba accord ya parnoki magizük) benoka National Liberation Army (ELN) den yimjung atema sensaksem tenzükshitsü aser temerenshi ajemtsüsu tenangzükba agütsür ozüng alema inyaksangshiba teloktem den sensak asemtsü nangzükogo.

2019 küm Bogota nung police academy ka bomb

amshia amakba lendong nung nisung 22 asüba sülen taoba tir Ivan Duque-i ELN den yimjung atema sensaksema aliba nungi atsüngin.

Petro-i Hokolbarnü sepaitem amakertem indang osang kecha magütsü, ajisüaka iba tesem nung FARC nungi jakzükba teloktem inyaksangshidar, ta security sources ajanga metetdaksü.

Item teloktem yagi taoba mapang parnok lenirtemi yimjung atema sensaksema

magizükler aser parnok kübok züngsem 2,400 shi lir, ta sorkari ashi.

Tawa item teloktem nungi tongtibang lenirtem aika tepsetogo, shirnok timba ka arrtsü adener Venezuela nung raratepba mapang tepsetba lir.

Colombia nung sorkar, left-wing telungpurtem, right-wing paramilitaries aser temesepba mozü shibelenertem tsüngda raratepba mapang 1985 nungi 2018 küm tashi nung nisung 450,000 shi tepsetogo.

Mkg. nung Mungmung benjungmung among



Dr. Likhase

Mokokchung, Rongjui/September 3(TYO) : Tanu Sangtam Union Mokokchung Town Mungmung benjungmung sentong Multi Sports Complex Mokokchung nung kanga dang longso longsoa mungogo.

Mungmung benjungmung ratet Dr.Likhase Sangtam-i jembidang iba Mungmung benjungmung ya tsurabur mapang nungi September 1 nungi 6 tashi amunger, aser

item anogo 6 nungji sobaliba kententepa, yar tsüingsangtepa aser sobaliba dak aketba yimyatem bentshia ka nung ka angazüktepa amungerta ashi.

Dr.Likhase-isa tsurabur putu limapur mapang nung nübur tsüngda mangatettep alibatem kati ka dang tai toktepa yimli agutsütep, aser sobaliba yimya tajungtem ajak bentshia aru ta ashi.

Kodang Yisu Khrista yimsü

aru iba sülenjibo sobaliba benshirtemji temenenpur ama bilem aser sobaliba senzuka yutsü, saka tanubo iba ama sobaliba sentong ayongzüka akaba ajanga Tsüngremi asenok nem sobaliba tajung agutsüba benshiteter aser iba ama sentong kin ka dang masü saka kin balala jaoka munga nübur tsüngda nung telungjem akangshir, anungji asen sobaliba tajungtem bentshia kati ka nungi angazükteptsü aser nübur rongnung telungjem akatsü asoshi bentshisüla ta Dr.Likhase Sangtam-isa adenshia aliba benjungmung ayongzüka jembi.

Kasa sentong nung , Sangtam Union Mokokchung Town President Rajet-i tarur pela-a agizükba o jembi aser iba den ano SDO(Civil) Mokokchung Longdiba Sangtam, ENPU Mokokchung President Yangsümong, Ao Senden President Chubawati Longchar parnokia tepela o jembiba den Yar tsüingsangba, Sobaliba kentenba aser sobaliba saya balala agi shilem agia iba Mungmung benjungmung sentong kanga dang longso longsoa agi.

Kiphire Town nung Mungmung benjung mungogo

Kiphire, Rongjui/September 03, 2022 (TYO): United Sangtam Likhum Pumji (USLP)-i Hokolbar anogo Local Ground, Kiphire nung Mungmung Tribal Festival sentong ayongzüka. Iba benjungmung sentong nung alakteta tejaoker ama Deputy Speaker, NLA, T. Yangseo Sangtam dena liasü, ta sangdong ajanga metetdaksü.

Sangtam kin-i küm nung benjung 12 tashi amunger aser item rongnung Mungmung benjungmung asütsü. Iba benjungmung tetezü togetherness forever lir aser küm shia September ita mezüng hopta nung iba benjung ayongzüker.

Tsüksüngongsüng alitsü asoshi temoatsü meshizüka iba benjungmung amunger aser akialu nung temoatsü alitsü asoshi yimertemi küm piyong meranga inyaker.

Deputy Speaker, NLA, T.

Yangseo Sangtam-i, tesünep aser temeimtep nung alitsü; aser pei sobaliba tajung kümzüka ayutsü asoshi Sangtam kin ajungshia liasü.

Mapa tamajung aser tangar bendanga amshiba yimya indoktsü aser yimtenren den lokti nung rongsenketzüng jenjang ajungkettsü asoshi longjemer inyaktüsü, ta pai telok ayongzüka.

Iba sentong nung kin balala nungi lennirtem adenba ngua pai tenüngsang agütsü aser Kiphire ya 'Mini - Nagaland' lir, kong kin balala tesünep aser yimji-yimjung nung alir, ta pai ashi.

Deputy Commissioner, Kiphire, T. Wati Aier-ia iba sentong nung jembia liasü.

Kiphire district nung kin pezü tsüngda telongjem tali tashiita aotsü aser ibaji ajanga Naga nung tsüngda longjemtsü asoshi ajungmesotsü imlar, ta pai ashi.

Nübur tsüngda yimji-yimjung

ali nungang terenlok alitsü, ta Aier-i shisem.

Iba benjungmung amungba tetezü indang nung ajemdaker Aier-i telok den lemsatetep aser Mungmung benjungmung ajanga sobaliba, tsüingsang, oshiooben, ken aser yimsü tem wazüka ayutsü asoshi pai ajungshia liasü.

Pei taküm nung meranga inyakba den tali ajemalutsü nungdaker aser iba den külemi tangatetba lokti ka ama tejakleni aotsü asoshi sorkar tetuyuba nung anidaksüla, ta DC Aier-isa ashi.

Taruba Mungmung benjungmung sentong nung skill development training ayongzüka den stall balala amenoktsüla, ta Aier-i bilemba ka telok den lemsatetep.

Mungmung benjungmung sentong nung yimtsüng balala nungi cultural troupe temi sobaliba tsüingsang sayuogo, ta kasa sangdong ajanga ashi.

Sür Küm Ka Ajungba Menungra Bilemteter

Late Mrs. Wailila Jamir
(M.C.T) Kobulong
04.09.2021 - 04.09.2022

Temeim oja, na onok nungi pilar küm ka ajungdang onoki na kanga menungra bilemteter. Tanü onoki ne mapang tajungtem ajak bilemteta sarasadema amonger.

Temeim chirnur aser semchirsemmur.



Ali Ayoker : Vihokhu yim anasa Foothill

Road nungi meter 50 shi pilar sen Rs. 45 per/Sq.ft agi talitsü kimong/residential plot ayoker.

Taliner temi iba nung ya contact südaksüner.

Ph no. 6009530632 / 6009094225

IMPUR CHRISTIAN HOSPITAL

ANM School of Nursing

Impur: Mokokchung, Nagaland

(Permitted by State Nursing Council, Nagaland)

ADVERTISEMENT

Applications are invited from the unmarried girls for undergoing 2 years FWH/ANM course at the ANM School of Nursing, Impur Christian Hospital, Impur Mokokchung (Permitted by SNC Nagaland) for the session 2022-23.

The following particulars are given for information of interested candidates:

1. The session will start from 1st October 2022
2. The last date for receipt of the application is 20.9.2022
3. Prospectus and Application form will be available from Impur Christian Hospital
4. Age: 17-25 years (as on 30.9.2022)
5. Qualifications: Class 12 pass in any stream
6. No. of seats - 20

Sd/-

Medical Superintendent
Impur Christian Hospital.

Directorate of Art & Culture-i metetdaksür

Dimapur, Rongjui/

September 03, 2022 (TYO): Directorate of Art & Culture-i sangdong ka ajanga, Department of Art & Culture nung dena alir Rural Libraries ajak 2022-2021 aser 2021-2022 atema kakettep September 07, 2022 nungi October 07, 2022 tashi office mapang agizüksü/bendentsü akok, ta metetdaksü.

Library ajak (Rural Libraries) Library Round Seal aser designation seal (President, Librarian mesüra General Secretary) bener arutsüla aser itemji medeni kakettep magütsütsü. Latetja aliba anogo tashi nung kakettep magizükra, District Cultural Officers/ Registering Officer temi pei pei Headquarters-i kakettep bener aotsü.

Mokokchung nung shisatokden aka

Mokokchung, 3rd Sept (TYO): Mokokchung Municipal Council-i MMC conference hall nung jana koda anepalua intoktsü (Solid Waste Management) aser tzunglu tzu koda ali telung nung rizünga ayuba ajanga kechi tajanzük agütsür ta asüba onük nung shisatokden sentong ka liogo. Iba sentong nung Mokokchung municipal kübok ward 18 nungi meyongertem arua shilem agia aden.

Iba sentong nung Mokokchung ADC & MMC Administrator, Chumlamo Humtsoe-i jembidang, Mokokchung nung jana tapu balala bendanga (segregate) intokba mapa ya kanga ajema angur. Kodang jana balalatem bendangteta intokdir, jana agi tagitarutsü aika akümer aser teintoktsü janaji kanga ajema akümer, aser iba ajanga jana anepalua intokba lenmang aisü nung tajanzük lir, ta ashi.

Iba den külemi

Mokokchung nung tzu agi anüngakongba ya ulura, anungji, tzu makongtsü/tzunglu tzu sota ayutsü atema ali telung nung tzu rizünga (recharge pit) yanglutsü asoshi ajungshia liasü. Mokokchung merükmejuba mapa takok angutsü asoshi MMC kisüngi kecha meinyaktetsü, anungji, MMC kübok aliba ward 18 sangertemi asalentong balala nung amalitepa yariteptsü asoshi MMC Administrator-isa ayongzüka liasü.

Tanü iba sentong nung Soil & Water Conservation Mokokchung aser Krishi Vigyan Kendra (KVK) Yisemyong nungi shisalen sayurtem arua parnoki jana tapu balala agi tagitarutsü kümdaksüba mapatem kar sayu aser tzu merosepi rizünga ayutsü atema ring well/bore well recharge koda yanglur aser ibaji ajanga kechi tajanzüktemsa agütsür, itemji shisatsütem lemsatetep liasü.



Honibar (03.09.2022) anüngdang West Police Station, Dimapur anasa MLA aser Advisor H Tovihoto Ayemi-i 'The Fit Factory/Spa' semzüksüba mapang tangokba noksa nung angur.

KDVA-i 17buba Foundation Day mungogo



Honibar anogo Kisama nung KDVA pur 17buba Foundation Day sentong agiba mapang KDVA ketdangsürtem aser züngsemtem külemi tangokba noksa nung angur.

Kohima, Rongjui/September 03, 2022 (TYO): Honibar anogo Angami Morung, Kisama nung Kohima District Volleyball Association (KDVA)-i 17buba Foundation Day munga liasü, ta sangdong ajanga metetdaksü. Kohima nung November mezüing hopta KDVA Open Tournament 2022 asayamung

ayongzüksü asoshi teloki lemtet. Iba den külemi taküm nungi tenzüka, asayartem tenokdangba kecha meli KDVA Open Tournament ajak atema lapoktsütsü asoshi bangjemtep. KDVA-isa September tatemlen volleyball referee clinic ayongzüksü telemtetba agiogo. Directorate of Youth Re-

sources & Sports Nagaland, Joint Director aser Advisor KDVA, Teisobou Sekhose-i tayongzüka o jembi. KDVA president Visasielie Suhu-i tir o jembia liasü. Iba sentong nung KDVA Technical Secretary, Mhalevilie Kere menden liasü aser Mhalehou Mere-i tepela anküp o jembi.

Marcelo-i Olympiakos den tezüngzüktep yangluogo

Rongjui/September 03, 2022 (Agencies): Brazil nunger football asayar takotet Marcelo-i Honibar anogo Greek soccer club 'Olympiakos' den tezüngzüktep yangluogo. Ajisiüaka, iba contract dak sendakba nung Club-i osang tejangja ka magütsü. Sangdong ka ajanga angazükba agi, Marcelo-i contract ya küm ka den küm talila ka (optional) atema

züngzüktep. Left back mesüra wing back asayar Marcelo-i tesüiba season 16 tashi Real Madrid atema asaya, kong Club putiotsü nung pai title' timba ajangzüktet. Title' 25 rongnung La Ligas - trok (6), Champions League - pungo (5), Supercopa de Espana - pungo (5), Club World Cups pezü - (4), Uefa Super Cups asem - (3) aser Copa del

Reys - ana (2) dena lir. Arishi küm 34 tain Marcelo-i 2014 aser 2018 World Cup asayamung densema 2006 nungi 2018 küm tashi Brazil National team atema match 58 asayaogo. Taoba Greek Superleague title asemen takok angur telok - Olympiakos-i tang asaya aliba season nung otsüsütsüsa trophy 48buba takok angutsü asoshi meranga asayadar.

Brian Lara-i SRH head coach inyaktsü



Brian Lara

New Delhi, Rongjui/September 03, 2022 (Agencies): Taruba Indian Premier League season nung taoba mapang Australia nunger cricket asayar Tom Moody-i Sunrisers Hyderabad head coach meinyaktsü. Iba franchise nung Moody melen head coach tasen ama cricket asayar mongin West Indies nunger Brian Lara shimogo, ta Honibar anogo Sunrisers

Hyderabad-i metetdaksü. 2013 aser 2019 küm tsüingda Moody-i Sunrisers Hyderabad nung shilem tajung agia takok ngua inyakogo. Item küm tsüingda Sunrisers Hyderabad team-i pungoben tashi playoffs stage tongteta asaya aser 2016 küm IPL takok ngua liasü. 2020 küm külem Australia nunger Trevor Bayliss-i head coach ama arishi küm 56 tain Moody melenzüka liasü, saka taoba küm pai director of cricket ama Sunrisers Hyderabad nung tanaben aden. "Team nung inyaka arur pa (Tom Moody) mapang agi tonga arur asünung, SRH ajungkettsüsa bendanga agütsür inyakba atema onoki Tom dang pelaba lemsateper. Tesüiba küm nungi pa akhüm nung team jenjang tajungba yanglua aruogo aser tarutsü nunga pa wadang nung maneni takok ngua inyaktsü asoshi

sarasademtsür," ta sangdong ka ajanga SRH-i metetdaksü. Taoba season nung team-i match asem dang koka jenjang tatemba nung tembangaka, Moody nem coach mapa lenzükja liasü. Head coach ama Sunrisers Hyderabad nung tanaben inyakba mapang Moody tebilemba matalok, kechiyong team 10 toktepba Indian Premier League nung team-i match trok dang takok angur aser match 8 nung tsükadok; aser iba season nung parnok jenjang 8buba nung tembang. Tawa, International League T20 nung Director of Cricket ama shimba sülen, Moody-i Desert Vipers nung adentsü. International League T20 nung franchise trok rongnung Desert Vipers ka asütsü. International League T20 asayamung sangküm (2023) January nung UAE kübok ayongzüksü terenemba lir.

Durand Cup: Army Red-i Hyderabad FC madak takok angu

Imphal, Rongjui/September 03, 2022 (Agencies): Honibar anogo Khuman Lampak Main Stadium, Imphal nung Army Red aser Indian Super League takok angur Hyderabad FC tsüingda asaya liasü. Iba match nung Army Red-i Hyderabad FC madak goal 1-0 agi takok nguogo. Iba match makok yongjia, Group nung temaba team ka ama quarter final atema Hyderabad FC pur qualify süa lir. HFC team coach Manolo Marquez-i Halicharan Narzary nem captain mapa lenzüktsüba den match nung asayar kar melentepa asayadaksü. Soyol Joshi-i iba asayamung nung Hyderabad FC atema mezüing asaya aser defence asayar tongti ana captain Nikhil Poojary den Chinglensana Singh mendeni team asaya liasü. Iba match mezüing half

minute 33buba nung Army Red-i goal ka inoktsütsü maongka angu, kong team nung asayar kati free kick ka metsüloktsüba mapang captain Suresh Meitei tekolak agi ball dak tongokja goal inoktsü. Kasa match nung Hyderabad FC-ia goal inoktsütsü maongka aika angu, saka Army Red goalkeeper Bhabindra Thakur-i ball junga nokdangba ajanga HFC puri goal ka danga meinoktsütet. Durand Cup asayamung nung Hyderabad FC-i match asem koka point 9 ngua lir. Ano külen, Army Red team-i point 5 anguba den parnok iba asayamung nungi tsükogo. Maneni, Group C nungi tanabuba quarterfinalist jangiatetsü asoshi aruya aliba Hombar (05.09.2022) anogo NEROCA FC aser Chennai FC tsüingda iba jenjang atema toktepsü terenemba lir.

AIFF Secretary General ama Shaji Prabhakaran shimogo

New Delhi, Rongjui/September 03, 2022 (Agencies): All India Football Federation nung President tasen Kalyan Chaubey-i Indian football achayangba tentet - AIFF indang Secretary General ama Dr. Shaji Prabhakaran shimogo. "Taoba mapang Dr. Shaji-i FIFA Regional Development Officer ama inyakdang lir aser Indian Football renloktsü asoshi pa smepet aser tasa tasen ajanga nungittsü," ta Chaubey-i ashi. Dr. Shaji dak alaka AIFF Technical Committee nung mendenbuba tasen ama IM Vijayan shima liasü. Parnok den yarisemtsü asoshi iba Committee nung züngsem ama Eugeneseon Lyngdoh, Climax Lawrence, Harjinder Singh, Arun Malhotra aser Pinki Bompal nunger aniokogo. Advisory Committee indang mendenbuba ama taoba mapang India football team cap-

tain Shabbir Ali shima liasü. AIFF President, Kalyan Chaubey-i ashiba agi, AIFF indang Deputy Secretary General tasen ama Sunando Dhar shimtsü asoshi züngsem ajaki mulungsoa agizük. Honibar (03.09.2022) anepdang Dwarka, Delhi kübok Football House (Indian Football indang headquarters) nung Executive Committee senden amenba mapang, ketdangpur tasen shimtsü asoshi telemtetba agi liasü. Iba senden nung Bhaichung Bhutia dak alaka, AIFF President, Vice President, NA Harris, Treasurer Ajay Kipa, Executive Committee nung züngsem tasen ajak aser India nunger football asayar nüngtugu trok denogo. Bhutia, shibai AIFF President menden atema election nung toktepa liasü, polls nung pai vote 1-33 agi Kalyan Chaubey makok.



Honibar anogo DDBA Indoor Stadium nung tenüngsang agütsüba sentong agiba mapang Dimapur District team aser DDBA züngsemtem külemi tangokba noksa nung angur. Tawa Longleng nung ayongba 'Nagaland Olympic & Paralympic Games 2022' - Li-Ning 44th Inter-District & State Open Badminton Championship nung Dimapur team-i shilem tajung agia category balala nung takok nguogo.

BILEMDANGANG
"Tenüng agitsü masü yimya ka ama tetenla."